

14 APR 1999

Rusuhan-Cedera

DUA ANGGOTA POLIS CEDERA PERTAHAN POTRET MAHATHIR

KUALA LUMPUR, 14 April (Bernama) -- Dua anggota polis, termasuk seorang konstabel wanita, cedera terkena serpihan kaca yang dipecahkan perusuh yang cuba merampas potret Perdana Menteri Datuk Seri Dr Mahathir Mohamad di pondok polis Jalan Masjid India di sini hari ini.

Dalam kejadian 4 petang itu, Konst (W) Verina Olin, 23, berasal dari Sabah dan L/Kpl Mustafa Azam, berumur 30-an, cedera di tangan dan muka.

Kedua-dua anggota polis itu sedang berkawal di pondok polis itu apabila kumpulan kira-kira 200 perusuh mengepung dan meminta mereka menyerahkan potret Perdana Menteri yang tergantung di situ.

Kumpulan perusuh tersebut sebelum itu melarikan diri daripada tindakan penyuraian polis di Jalan Tun Perak dan menyelamatkan diri melalui Jalan Masjid India.

Bagaimanapun, kedua-dua anggota polis itu segera mengunci pintu pondok dan memohon bantuan.

Apabila pondok itu dikunci, perusuh bertindak memecahkan cermin mengakibatkan serpihan itu mencederakan Verina dan Mustafa.

Bagaimanapun sebelum sempat perusuh itu memasuki pondok untuk merampas potret Perdana Menteri, polis bantuan dan FRU tiba.

Verina dan Mustafa diberi rawatan di Balai Polis Dang Wangi.

Tiada perusuh ditahan dalam kejadian itu.

-- BERNAMA

SLR AHH NMO